

## REGLUR

### um ferðakostnað sjúklinga og aðstandenda þeirra innanlands.

#### 1. gr.

##### *Gildissvið.*

Þurfi sjúklingur að takast ferð á hendur til meðferðar eða óhjákvæmilegs eftirlits hjá lækni, tannlækni eða á sjúkrahúsi (með eða án innlagningar) eða til þess að njóta óhjákvæmilegrar meðferðar samkvæmt tilvísun læknis hjá heilbrigðisstéttum, sem sjúkratryggingar hafa samið við, taka sjúkratryggingar þátt í ferðakostnaði samkvæmt reglum þessum, enda sé um að ræða eftirtalda alvarlega sjúkdóma og meðferð þeirra: Illkynja sjúkdóma, nýrnabilun, alvarlega augnsjúkdóma, brýnar lýtalækningar, bæklunarlækningar barna og tannréttingar vegna meiri háttar galla eða alvarlegra tilefna. Ennfremur er heimilt að endurgreiða vegna annarra sambærilegra sjúkdóma eða alvarlegra vandamála í meðgöngu. Hið sama gildir um ferðir vegna bráðatilvika sem farnar eru skv. ákvörðun læknis og ekki er hægt að sinna í heimabyggð svo og heimferðir að loknu sjúkraflugi.

#### 2. gr.

##### *Læknisfræðilegur úrskurður.*

Til þess að hægt sé að úrskurða hvort sjúklingur eigi rétt á endurgreiðslu samkvæmt reglum þessum skal hann útvega skýrslu frá þeim lækni sem sendir hann. Þegar ekki er um bráðatilvik að ræða ber að jafnaði að leita eftir úrskurði tryggingayfirlæknis áður en ferðin er farin. Í skýrslunni skal gerð grein fyrir sjúkdómnum, nauðsynlegri meðferð og hversu oft sjúklingurinn þurfi að koma. Skýrsluna skal senda Tryggingastofnun ríkisins, tryggingayfirlækni, til úrskurðar. Tryggingastofnun sendir sjúklingi úrskurðinn og sendir jafnframt viðkomandi tryggingaumboði afrit. Tryggingaumboðið annast síðan greiðslur til sjúklings þaðan í frá í samræmi við reglur þessar.

#### 3. gr.

##### *Endurgreiðsla sjúkratrygginga.*

Sjúkratryggingar endurgreiða að hluta ferðakostnað ef um er að ræða a.m.k. 15 km vegalengd á milli staða. Sjúklingur skal framvísa í tryggingaumboði sínu vottorði til staðfestingar á hverri komu, útgefnu af þeim, sem meðferð veitir. Sjúkratryggingar endurgreiða 2/3 hluta kostnaðar af raunverulegu fargjaldi með venjulegri áætlunarferð eða af reiknuðu fargjaldi með áætlunarbifreið á hverjum tíma ef eiginn bíll er notaður. Greiðsluhluti sjúklings skal þó aldrei verða hærri en 1.000 kr. í hverri ferð. Ef ætla má að raunverulegur kostnaður sé lægri en áætlunarfargjald, skal miða við hann. Sjúkratryggingar endurgreiða 2/3 hluta kostnaðar vegna leigubílaaksturs milli aðseturs sjúklings og meðferðarstaðar, samkvæmt framlögðum skýrum kvittunum, þótt vegalengd

sé skemmri en 15 km, enda sé sjúklingur ekki fær um að ferðast með áætlunarbíl eða strætisvagni. Í slíkum tilvikum er greiðsluhluti sjúklings ætíð 1/3 af heildarkostnaði.

Sérstakt fargjald fylgdarmanns endurgreiða sjúkratryggingar samkvæmt sömu reglum og getið er í 1. mgr. þessarar greinar, ef sjúklingurinn er 16 ára eða yngri eða ef hann er ósjálfbjarga. Þetta á þó einungis við um áætlunarferðir.

Sjúkratryggingar endurgreiða með sömu skilyrðum og getið er í 1. mgr. þessarar greinar nauðsynlegar ferðir foreldris eða nánasta aðstandanda til að vitja sjúklings 16 ára og yngri. Endurgreiðsla slíkra ferða takmarkast við eina vitjun á viku til sjúklings.

Þegar nauðsynleg lækni meðferð vegna tilvika sem um getur í 1. gr. tekur a.m.k. fjórar vikur, endurgreiða sjúkratryggingar kostnað við ferðir heim aðra hverja helgi skv. reglum þessum.

4. gr.

#### *Gildistaka*

Reglur þessar, sem settar eru af tryggingaráði, á grundvelli staflíðs j í 1. mgr. 36. gr. laga nr. 117/1993, um almannatryggingar, staðfestast hér með, sbr. og 3. mgr. 36. gr. s.l., og öðlast gildi 1. apríl 1996. Frá sama tíma falla úr gildi reglur nr. 74 frá 12. febrúar 1991 um ferðakostnað sjúklinga og aðstandenda þeirra innanlands.

*Heilbrigðis- og tryggingamálaráðuneytinu, 28. mars 1996.*

**Ingibjörg Pálmadóttir.**

*Davíð Á. Gunnarsson.*

## AUGLÝSING

### um breytingu á gjaldskrá Rafmagnsveitna ríkisins.

Samkvæmt orkulögum nr. 58 29. apríl 1967 hefur ráðuneytið staðfest eftirfarandi breytingu á gjaldskrá Rafmagnsveitna ríkisins, er taki gildi 1. apríl 1996.

Gjaldskrá Rafmagnsveitna ríkisins nr. 196 30. mars 1995:

Gjaldskrá Rafmagnsveitna ríkisins fyrir smásölu og heildsölu orku hækkar um 3% frá og með 1. apríl 1996. Tengigjöld taka breytingum frá sama tíma miðað við breytingu á byggingarvísitölu frá janúar 1995 til janúar 1996.

Afsláttur Rafmagnsveitnanna vegna hitunar íbúðarhúsnæðis hækkar sem hér segir:

C.1.	Rofin daghitun	úr 0,03 kr/kWh	í 0,085 kr/kWh
A.5.	Markmæling	úr 0,02 kr/kWh	í 0,058 kr/kWh
H.1.	Hitaveita (R/O)	úr 0,03 kr/kWh	í 0,070 kr/kWh
C.2.	Næturhitun	úr 0,02 kr/kWh	í 0,053 kr/kWh

*Iðnaðarráðuneytinu, 29. mars 1996.*

F. h. r.

**Þorkell Helgason.**

*Steinunn Bjarman.*